



Arkivnr: 2015/12781-2

Saksbehandlar: Britt Karen Spjeld og Hanne Espe

## Saksframlegg

### Saksgang

Utval	Saknr.	Møtedato
Utval for kultur, idrett og regional utvikling		19.01.2016

## Høyringsfråsegn kommunedelplan for idrett, friluftsliv og nærmiljø 2016 -2026 - Radøy kommune

### Samandrag

Radøy kommune har meldt kommunedelplan for idrett, friluftsliv og nærmiljø 2016 -2026 til offentlig ettersyn med høyringsfrist 1. februar 2016.

Kommunedelplan for idrett, fysisk aktivitet og friluftsliv er ein tematisk plan som har status som kommunedelplan med heimel i plan- og bygningslova §11-1. Kulturdepartementet set følgjande krav i Føresegner om tilskot til anlegg for idrett og fysisk aktivitet – 2015, punkt 2.2.7: *Det er eit vilkår for å kunne søke om spelemidlar at anlegget er ein del av ein vedteken kommunal plan som omfattar idrett og fysisk aktivitet.*

Radøy kommune skriv at planen skal vera eit styringsverktøy for politikarar og administrasjonen i kommunen, og danna grunnlag for prioriteringar og strategiar innanfor fagfeltet. Gjennom prioriteringane i planen ønskjer kommunen å leggja til rette for auka fysisk aktivitet, og stimulera til betre helse og trivsel hos innbyggjarane i kommunen.

**Forslag til vedtak**

1. Hordaland fylkeskommune meiner at mål, strategiar og handlingsprogram svarer på aktuelle utfordringar i Radøy kommune, og rår til at gjennomføringa av kommunedelplanen vert prioritert i økonomiplanen.
2. Hordaland fylkeskommune rår til at det vert gjort justeringar og presiseringar i planen i tråd med merknadene i saka.

Rune Haugsdal  
fylkesrådmann

Per Morten Ekerhovd  
konst. fylkesdirektør kultur og idrett

*Saksframlegget er godkjent elektronisk og har derfor inga underskrift.*

## Fylkesrådmannen, 05.01.2016

### Bakgrunn

Radøy kommune har meldt kommunedelplan for idrett, friluftsliv og nærmiljø 2016 -2026 til offentlig ettersyn med høyring fram til 1. februar 2016.

Kommunedelplan for fysisk aktivitet, idrett og friluftsliv er ein tematisk plan som har status som kommunedelplan med heimel i plan- og bygningslova §11-1 *Kommunen skal ha en samlet kommuneplan som omfatter samfunnsdel med handlingsdel og arealdel. Kommuneplanen skal ivareta både kommunale, regionale og nasjonale mål, interesser og oppgaver, og bør omfatte alle viktige mål og oppgaver i kommunen. Den skal ta utgangspunkt i den kommunale planstrategien og legge retningslinjer og pålegg fra statlige og regionale myndigheter til grunn. Det kan utarbeides kommunedelplan for bestemte områder, temaer eller virksomhetsområder. Kommuneplanen skal ha en handlingsdel som angir hvordan planen skal følges opp de fire påfølgende år eller mer, og revideres årlig. Økonomiplanen etter kommuneloven § 44 kan inngå i handlingsdelen.*

Kulturdepartementet set følgjande krav i Føresegner om tilskot til anlegg for idrett og fysisk aktivitet – 2015, punkt 2.2.7: *Det er eit vilkår for å kunne søke om spelemidler at anlegget er ein del av ein vedteken kommunal plan som omfattar idrett og fysisk aktivitet.*

Kulturdepartementet har utarbeidd ein eigen rettleiar for utarbeiding av kommunedelplanar for idrett og fysisk aktivitet; «Kommunal planlegging for idrett og fysisk aktivitet» (V-0798, revidert utgåve 2014).

I brev av 1. desember 2015 gjer Kulturdepartementet følgjande presiseringar:

- *«Fylkeskommunen kan ikke underkjenne/avslå vedtak om kommunal plan gjort i kommunestyret (med hjemmel/som følge av spillemiddelordningen). Men kan velge å ikke prioritere anlegget i tildelingen.*
- *Når dokumentasjon på anleggets plass i kommunal plan ikke foreligger ved idrettsfunksjonell forhåndsgodkjenning skal det i forhåndsgodkjenningen forutsettes at dette foreligger dokumentert ved søknad om spillemidler. Hvis ikke dette foreligger skal ikke spillemiddelsøknaden godkjennes.*
- *Der hvor gjeldende kommunal plan er utgått skal det forutsettes i idrettsfunksjonell forhåndsgodkjenning at anlegget er tatt inn i ny plan før spillemiddelsøknad sendes. Dokumentasjon må foreligge for at spillemiddelsøknaden kan godkjennes.»*

### Regionale retningslinjer og vurderingar:

For ei effektiv gjennomføring av den regionale politikken i Hordaland er samspelet med stat og kommunar avgjerande. I handsaminga av planframlegget vurderer difor fylkesrådmannen i kva grad kva grad det samsvarer med vedteken regional politikk på feltet, jf Regional kulturplan for Hordaland 2015-2025.

Regional kulturplan har som mål å leggje til rette for auka fysisk aktivitet for innbyggjarane i heile Hordaland og føreset mellom anna at dei viktigaste satsingane på idrett, fysisk aktivitet og friluftsliv vert initiert i lokalsamfunn og kommunar. Det er eit sentralt prinsipp å leggje til rette for aktivitets- og anleggsutvikling basert på lokale behov, og dei viktigaste drivkreftene i slike prosessar skal vere innbyggjarane i lokalsamfunna, lag, organisasjonar, skulane mv. Ein godt samordna og forma kommunedelplan som er i samsvar med den regionale politikken er eit tenleg reiskap for å sikre slike samarbeid og for å fremje fysisk aktivitet i kommunen.

Slik fylkesrådmannen vurderer det er heilskapen i Radøy kommune sitt planframlegg i samsvar med hovudintensjonane i Regional kulturplan. For forankringa og gjennomføringa av den regionale politikken for idrett og friluftsliv er difor framlegget eit godt rammeverk for vidare samarbeid mellom kommune, fylkeskommune og stat. Det er fylkesrådmannen si vurdering at planen gjev gode svar på korleis ein kan realisere desse ambisjonane.

### Kap 1 Innleiing

Fylkeskommunen ser positivt på at planen er sett i samheng med både kommuneplanen sin arealdel og samfunnsdel. Planen gjer også innspel ved revisjon og utarbeiding av andre kommunale planar, og i arbeid med økonomiplanen.

Det har vore brei medverknad i planprosessen, fylkeskommunen ser særleg positivt på bruk av barnetråkk som metode og kartlegging av friluftsområde knytt til skular og barnehage.

### **Kap 2 Rammer og overordna føringar**

Det er ei brei og god oversikt over nasjonale, regionale og kommunale lover og forskrifter. Radøy skil seg positivt ut i helseoversikta for kommunen med at heile 78% av ungdomsskuleelevene er fysisk aktiv på fritida.

### **Kap 3 Resultatvurdering av førre plan**

God evaluering av førre plan. Det er gjennomført mykje i høve ordinære anlegg i samarbeid med lag og organisasjonar, men at ein ikkje har lukkast i like stor grad i høve nærmiljøanlegg. Situasjonen er godt analysert, og planen gir retning for korleis dette skal prioriterast framover.

### **Kap 4 Utfordringar og utviklingstrekk**

I oversikta frå SSB i tabell i kap 4.1 er det delt inn i aldersgrupper frå 0-17 år og 18-49 år. Dette er store grupper med sær sære ulike behov, og statestikken vert såleis vanskeleg å bruke på ein konstruktiv måte.

Planen analyserer situasjonen i høve fysisk aktivitet godt, og peikar på utfordringar for ulike målgrupper. Det er positivt at kommunen vil gjennomføre ei ny og grundigare undersøking av aktivitetsnivået i befolkninga, slik at ein kan spissa tiltaka mot å få fleire i aktivitet.

Fylkeskommunen ser positivt på at det vert tilrettelagt ein universelt utforma turveg i kommunen, og oppmodar Radøy til også å prioritere å tilrettelegge eit friluftsområde for personar med nedsett funksjonsevne. Dette er i tråd med regional kulturplan der det er eit konkret tiltak at det skal vere minst eitt universelt utforma friluftsområde i kvar kommune.

Planen peikar på manglande anlegg for fleire småidrettar, både på Radøy og i Nordhordland, og at ein bør utarbeide felles anleggsplan for regionen. Dette er veldig positivt.

Ein vedlikehaldsplan for nærmiljøanlegga vil vere eit god oversikt over vedlikehaldsbehov av anlegga i kommunen.

### **Kap 5 Anleggs- og aktivitetsstatus**

For å auke bruken av eksisterande turløyper, bør det vurderast lyssetjing (Jf regional kulturplan). Dei i nærmiljøet bør prioriterast. Dette bør vurderast å legge inn som punkt 3 i kap. 6.2.2 Anlegg og delmål seks.

Fylkeskommunen er positiv til at det vert etablert delanlegg friidrett knytt til eksisterande anleggsparkar (Jf regional kulturplan).

### **Kap 7 Handlings- og langtidsprogram**

Prioritert handlingsprogram for ordinære anlegg og nærmiljøanlegg er noko mangelfulle i høve økonomiplan.